



Ni Presidente Thomas S. Monson

Palanasem ti Pagnaan Dagita Saksakam

No kitaentayo ni Jesus kas Pagwadantayo ken no surotentayo dagiti tugotna, makapagsublityo a sitatalged iti Nailangitan nga Amatayo.

Ay-ayatek a kakabsatko, napakumbabaak bayat ti panagtakderko iti sanguananyo ita a bigat. Dawatek ti pammati ken kararagyo para kaniak bayat ti panangibinglayko kadakayo ti mensahek.

Nangrugitay amin iti daytoy nakasdasdaaw ken napateg a panagbaniaga idi pumanawtayo iti lubong ti espiritu ket simrek iti daytoy masansan a mapannubok nga addang a maawagan iti mortalidad. Dagiti kangrunaan a panggep ti panagbiagtayo iti daga ket manggun-od iti bagi a nagtagilagsag ken nagtagitulang, manggun-od iti padas nga umay laeng babaen ti pannakisina kadagiti nailangitan a nagannaktayo, ken mangkita no matungpaltayo met laeng dagiti bilin. Iti libro ni Abraham kapitulo 3 mabasatayo: “Ket ipaneknektayo kadakuada daytoy, ta kitaentayo no aramidenda amin a banag nga ibilin kadakuada ti Apo a Diosda.”¹

Idi umaytayo ditoy daga, intugot-tayo dayta naindaklan a sagut manipud iti Dios—ti kinawayatayo

nga agpili. Iti adu a wagas adda pribilehiotayo a pumili para iti bagbagitayo. Ditoy a makasursurotayo manipud kadagiti napapait a padas. Makailasintayo iti nasayaat ken dakes. Ammotayo ti paggidiatan ti napait ken nasam-it. Masursurotayo a dagiti desision ti mangikeddeng iti pagtungpalan.

Awan duaduaq a pinanawantayo ti Amatayo nga addaan iti nasged a tarigagay nga agsubli Kenkuana, tapno makagun-odtayo iti pannakaitan-ok a planona para kadatayo ken tartarigagayantayo unay. Nupay nabatitayo tapno mangsapul ken mangsurot iti dayta a dalan a mangiturongto kadatayo nga agsubli iti Amatayo iti Langit, dinatayo imbaon ditoy nga awan pangiturong ken pangiwanwan. Ketdi, inikkannatayo kadagiti ramit a kasapulattayo, ket tulongannatayo no kiddawentayo ti tulongna ken ikarigattantayo nga aramidem ti amin a kabaellantayo nga agibtur agingga iti kanibusanan ken manggun-od iti agnanayon a biag.

Tapno makatulong a maiwanwantayo addaantayo kadagiti balikas ti Dios ken ti Anakna a masarakan kadagiti nasantuan a kasuratan. Addaantayo iti balakad ken pannursuro dagiti propeta ti Dios. Kangrunaan ti amin, naipaayantayo iti naan-anay a pagwadan a surotentayo—ti pagwadan ti Apotayo ken Mangisalakantayo, ni Jesucristo—ken nabilintayo a sumurot iti pagwadanna. Kinuna ti Mangisalkan a Mismo: “Umayka, surotennak.”² “Dagiti banag a naimatanganyon nga inaramidko ti aramidenyonto met.”³ Sinaludsodna, “Ania a kita ti tao ti rumbeng a pagbalinanyo?” Ket insungbatna, “Pudno kunak kadakayo, kas kaniak.”⁴ “Tinandaannna ti dana ket inturongna ti dalan.”⁵

No kitaentayo ni Jesus kas Pagwadantayo ken no surotentayo dagiti tugotna, makapagsublityo a sitatalged iti Nailangitan nga Amatayo tapno makipagnaed Kenkuana iti agnanayon. Kinuna ni propeta Nephi, “Malaksid no agibtur ti tao agingga iti panungpalan, a mangsurot iti pagwadan ti Anak ti sibibiag a Dios, saanto a maisalakan.”⁶

Maysa a babai, tunggal isalaysayna dagiti padasna bayat ti isasarungkarna iti Nasantuan a Daga, kinunana, “Nagnaak iti nagnaan ni Jesus!”

Nalibotnan ti lugar a nagnaedan ken nangisuruan ni Jesus. Nalabit a nagtakder iti rabaw ti dakkal a bato a nagtakderan idi ni Jesus wenno nakitanan ti kabanbantayan a minatmatan idi ni Jesus. Dagiti padas, a napasaranna, ket nangparagsak unay kenkuana; ngem ti pannagnana iti *lugar* a nagnaan idi ni Jesus ket saan a kas iti kapateg ti pannagna a *kas* iti pannagnana. Iti panangtuladna

kadagiti tignay ni Jesus ken panang-surotna iti pagwadanna ket adayo a napatpateg ngem iti panangpadasna a mangsapul kadagiti tugot iti nagna-anna iti daytoy a biag.

Idi idiaya ni Jesus iti maysa a nabaknang a lalaki ti awis, “Umayka, surotennak,”⁷ saanna laeng a plano a sumurot Kenkuana ti nabaknang a lalaki nga umuli ken bumaba kadagiti turod ken tanap ti ballasiw a pagilian.

Saan a nasken a magnatayo kadagiti igid ti baybay ti Galilea wenno kadagiti turod ti Judea tapno magnatayo iti nagnaan ni Jesus. Makapagnatayo amin iti dalan a nagnaan ni Jesus no, dumdumngegtayo kadagiti balikasna, punpunnuen ti Espirituna ti puspusotayo, iwanwanwandatayo dagiti pannursurona, pilientayo ti sumurot Kenkuana bayat ti panangdaliasattayo iti daytoy a biag. Ti pagwadanna ti manglawag iti dalan. Kinunana, “Siak ti dalan, ti kinapudno, ken ti biag.”⁸

No amirisentayo ti dalan a napa- nagnaan ni Jesus, makitatayo a napasaran ti adu a pannubok a mapasarantayonto iti biag.

Kas pagarigan, napasaran ni Jesus ti dana ti pannakapaay. Nupay napasaran ti adu a pannakapaay, maysa kadagiti makasagid unay rikna ket ti panagladingitna para iti Jerusalem idi igibusna ti panagministrana kadagiti tao. Saan nga inawat dagiti anak ti Israel ti talged ti pannalaknib nga indiyana kadakuada. Iti panang- matmatna iti siudad nga asidegen a madadael, nakarikna Isuna ti nalaus a panagliday. Iti panagladingitna inyararawna, “O Jerusalem, Jeru- salem, a mangpappapatay kadagiti propeta, ken mangbatbato kadakuada a naibaon kenka; tinarigagayak nga ummongen a sangkamaysa dagiti annakmo, kas iti panangummong ti pamusian dagiti piekna iti uneg dagiti payakna, ket dimo inaramid!”⁹

Napadasan ni Jesus ti dana ti sulisog. Ni Lucifer, a dakes, a nangummong iti kadakkelan a pigsana, ti makagargari unay a kinaulbodna, nangsulisog Kenkuana a nagayuno iti 40 nga aldaw ken 40 a rabii. Saan a

simmuko ni Jesus; ketdi, linabananna ti tunggal sulisog. Ti panggibus a saona, “Umadayoka, Satanas.”¹⁰

Napadasan ni Jesus ti dana ti pannakapasakit. Panunotenyo ti Getsemani, ti lugar a “nagtutuo- kanna unay. . . ket nagling-et iti kas la kadagiti tedted ti dara a nagtinnag iti daga.”¹¹ Ken awan ti makalipat iti panagsagabana iti naulpit a krus.

Magnanto ti tunggal maysa kada- tayo iti dana ti pannakapaay, nalabit a gapu iti napukaw a gundaway, na- abuso a bileg, pangngeddeng dagiti ipatpateg, pangngeddeng a datayo mismo ti nagaramid. Ti dana ti sulisog ti agbalinto a dana ti tunggal maysa. Mabasatayo iti maika-29 a benneg ti Doktrina ken Katulagan: “Ket nasken unay a sulisogen ti sairo dagiti annak ti tattao, wenno saanda a makapagtig- nay iti bagbagida.”¹²

Kasta met a mapadasantayonto ti dana ti pannakapasakit. Datayo kas katulongan, makanamnatayo iti ad-adu pay ngem iti Apo, a pimmanaw iti daytoy a biag laeng kalpasan ti nakaro a sakit ken panagsagaba.

Idinto a mapadasantayonto ti nalaus a panagladingit, mapadasantayo met ti nalaus a kinaragsak.

Datayo, a kaduatayo ni Jesus, ket makapagnatayo iti dana ti panagtul- nog. Saanto a kanayon nga agbalin a nalaka daytoy, ngem agbalin koma ti pagsasao a tawid nga imbati ni Samuel: “Adtoy ti panagtulnog naim- imbag ngem iti panagsakripisio, ken panangpipangag ngem iti kinalukmeg dagiti karkarnero a lallaki.”¹³ Laglagi- pentayo koma a ti bunga ti kinasukir ket pannakaadipen ken ipapatay, idinto a ti gunggona iti panagtulnog ket wayawaya ken agnanayon a biag.

Datayo, katulad ni Jesus, ket maka- pagnatayo iti dana ti panagserbi. Kas iti agrimrimat a silaw nga agsapul iti kinaimbag ti biag ni Jesus bayat ti panagserbina kadagiti tao. Pinapig- sana dagiti saka ti pilay, insublina ti panagkita ti bulsek, ken ti panag- dengngeg ti tuleng.

Napadasan ni Jesus ti dana ti panagkararag. Sinuruannatayo no

kasano ti agkararag babaen ti pan- nangtedna kadatayo iti napintas a kararag nga ammotayo a ti Kararag ti Apo. Ket asino ti makalipat iti kararagna iti Getsemani, “Saan koma a maaramid ti pagayatak, no di ti pagayatom?”¹⁴

Dagiti dadduma pay a pammilin nga inted kadatayo ti Mangisalikan ket adda kadagiti ungto ti ramaytayo, a masarakan kadagiti nasantuan a kasuratan. Iti Sermonna iti Bantay, imbagana kadatayo nga agbalintayo a manangngaasi, napakumbaba, nalinteg, natarnaw iti panagpuspuso, ken mannakikappia. Binilinnatayo a situtured a mangitakder iti pam- matitayo, uray no mauy-uyaw ken maidaddadanestayo. Indawatna kadatayo a parayrayentayo dagiti silawtayo tapno makita dagiti dad- duma dagitoy ken maaddaanda iti tarigagay a mangitan-ok iti Amatayo iti Langit. Sinuruannatayo nga agba- lin a nadalus iti dayaw iti agpada a panunot ken tignaytayo. Imbagana kadatayo a napatpateg nga amang ti mangidulin kadagiti gameng iti langit ngem iti daga.¹⁵

Dagiti pangngarigna ti mangi- suro inga addaan bileg ken turay. Iti pakasaritaan ti naimbag a Samari- tano, sinuruannatayo nga agayat ken agserbi kadagiti padatayo a tattao.¹⁶ Iti pangngarigna maipapan kadagiti talento, sinuruannatayo a mangpa- sayaat iti bagbagitayo ket mangika- rigatan nga agbalin a perpekto¹⁷ iti pangngarig ti napukaw a karnero, binilinnatayo a mapan umarayat kadagiti pimmanawen iti dana ken nayaw-awanen iti dalanda.¹⁸

Iti panangkarigatantayo a ma- ngikabil ken ni Cristo iti sentro ti biagtayo babaen ti panagsursuro ka- dagiti balikasna, panagsurot kadagiti pannursurona, ken babaen ti pan- nagna iti dalanna, inkarina kadatayo nga ibinglayna kadatayo ti agnanayon a biag a nangidatonanna iti biag tapno magun-od. Awan ti panggep a nangatngato pay ngem iti daytoy, a nasken a pilientayo nga awaten ti wagasna ket agbalintayo a disipulona

ket aramidentayo ti aramidna iti unos ti panagbiagtayo. Awanen ti sabali pay a wagas, awan ti sabali a mapilitayo, nga ad-adda pay ngem iti maaramidna kadatayo.

Iti panangpanunotko kadagiti pudno a nangikarigatan a sumurot iti pagwadan ti Mangisalakan ken nakapagnan iti nagnaanna, dagus a mapanunotko ti nagan da Gustav ken Margarete Wacker—dua kadagiti addaan iti kangrunaan a kababalin ni Cristo a naam-ammokon. Isuda ket umili nga Aleman a nakigangannaet iti akindaya a Canada, ket naam-ammok ida idi nagserbiak a kas mission president sadiay. Maysa a barbero ni Brother Wacker. Nupay bassit laeng ti pamataudanda, imbiglayda ti amin nga adda kadakuada. Saanda a naparaburan kadagiti annak, ngem inaywananda ti amin a sumrek iti pagtaenganda. Dagiti deadal a lallaki ken babbai ket sinapulda dagitoy nanumo, awan adalna a katulongan ti Dios ket imbilangda ti bagida a nagsatda no makabubosda uray maysa

laeng nga oras a makadennada isuda.

Gagangay ti langada, agbeddaldala nga agsao iti Ingles ken medio narigat a maawatan, bassit ti pagtaenganda. Awan kukuada a kotse wenno telebision, wenno saanda a nagaramid iti ania man kadagiti banag a gagangay a pakaawisan iti imatang ti lubong. Ngem masansan a sumarungkar kadakuada dagiti napudno tapno riknaenda ti espiritu nga adda sadiay. Ti pagtaenganda ket maysa a langit iti daga, ken ti espiritu a rumanraniag kadakuada ket natarnaw a kappia ken kinaimbag.

Mabalintayo met ti maaddaan iti dayta nga espiritu ket maibinglaytayo daytoy kadagiti tao bayat ti panagnatayo iti dalan ti Mangisalakan ken panangsurottayo iti naan-anay a pagwadanna.

Mabasatayo iti Proverbio ti balakad, “Palanasem ti pagnaan dagita saksakam.”¹⁹ No aramidentayo, maaddaantayonto iti pammati, uray pay ti tarigagay, a magna iti dalan a pagnaan ni Jesus. Saantayto nga

agduadua a ti dalan a pagpagnaantayo ket tartarigagayan ti Amatayo a surotentayo. Ti pagwadan ti Mangisalakan ti agserserbi a balangkas para iti amin a banag nga aramidentayo, ken dagiti balikasna ti manamnana a tarabay. Ti dalanna ti mangkibin kadatayo nga agawid. Daytoy koma ti agbalin a bendisientayo, ikararagko iti nagan ni Jesucristo, nga ay-ayatek, a pagserserbiak, ken pampaneknekak, amen.

DAGITI NAGADAWAN

1. Abraham 3:25.
2. Lucas 18:22.
3. 3 Nephi 27:21.
4. 3 Nephi 27:27.
5. “How Great the Wisdom and the Love,” *Hymns*, no. 195.
6. 2 Nephi 31:16.
7. Lucas 18:22.
8. Juan 14:6.
9. Lucas 13:34.
10. Mateo 4:10.
11. Lucas 22:44.
12. Doktrina ken Katulagan 29:39.
13. 1 Samuel 15:22.
14. Lucas 22:42.
15. Kitaen iti Mateo 5; 6.
16. Lucas 10:30–37
17. Kitaen iti Mateo 25:14–30.
18. Kitaen iti Lucas 15:4–7.
19. Proverbio 4:26

Dagiti Pannursuro para iti Panawentayo

Manipud iti Oktubre 2014 agingga iti Abril 2015, dagiti adalen iti Melchizedek Priesthood ken Relief Society kadagiti maikapap a Domingo ket nasken a maisagana manipud iti maysa wenno ad-adu pay a bitla a naited iti sapaap a komperensia ti Oktubre 2014. Iti Abril 2015, mabalina a mapili dagiti bitla manipud iti sapaap a komperensia ti Oktubre 2014 wenno Abril 2015. Nasken a pilien dagiti stake wenno district president no ania dagiti mensahe nga usarento kadagiti lugarda, wenno mabalinda nga idutok daytoy a pagrebbeangan kadagiti bishop ken branch president.

Sidadaan a magun-od dagitoy a bitla iti adu a lengguahe iti conference.lds.org.



Ni Presidente Dieter F. Uchtdorf

Maikadua a Mammagbaga iti Umuna a Panguluon

Panangawat iti Pammaneknek iti Lawag ken Kinapudno

Ti bukodyo a pammaneknek iti lawag ken kinapudno saan laeng a mangbendision kadakayo ken ti kaputotanyo ditoy a biag, no di kaduaennakayonto pay iti unos ti kinaagnanayon.

Kas maysa a piloto ti eroplano, nagpatayabak iti adu nga oras kadagiti kontinente ken taaw iti kasipngetan ti rabii. Iti panangbuyak iti tangatang iti rabii iti labes ti tawa, nangnangruna ti Milky Way, masansan a masmasdaawak iti kalawa ken kauneg dagiti parsua ti Dios—kas inladawan dagiti nasantuan a kasuratan a “saan a mabilang a lubong.”¹

Agarup nakurang a maysa a siglo ti napalabas nga impapan ti kaaduan nga astronomo a ti Milky Way galaxy ti kakaisuna a lawang iti uniberso.² Impapanda nga amin nga adda iti ruar ti lubongtayo ket nalawa nga ubaw, awan patinggana a kinaawan—awan nagan, nalamiis, ken awanan bituen, lawag, ken biag.

Iti ad-adda a panagdur-as dagiti largabista— a pakairamanan dagiti largabista a maibati iti

lawang—nangrugi a nakita dagiti astronomo ti nakaskasdaaw, dandani di magaw-at ti panunot a kinapudno: ti uniberso makaulaw ken dakdakkell ngem iti sigud a pinamati ti asino man, ken napno dagiti langit iti di mabilang a lawang, a di maarapaap a nakaad-adayo kadayo, a ti tunggal maysa ket naglaon iti ginagasut a billion dagiti bituen.³

Iti ababa unay a panawen, nagbalbaliw a naminpinsan ti pannakaawat-tayo iti uniberso.

Iti agdama makitatayo ti sumagmamano kadagitoy nakaad-adayo a lawang wenno galaxy.⁴

Ammotayo nga addada sadiay.

Addadan sadiay iti nakabaybaya-gen a panawen.

Ngem sakbay a naaddaan dagiti tao kadagiti nabileg nga instrumento nga umdas a mangurnong iti

nailangitan a lawag ken mangisangbay iti kaadda dagiti lawang wenno galaxy, ditay pinati a mapasamak ti kasta a banag.

Ti kadakkell ti uniberso saan a kellaat a nagbalbaliw, ngem ti kabalantayo a mangkita ken makaawat iti daytoy a kinapudno ket nagbalbaliw a naminpinsan. Ket iti dayta dakdakkell a lawag, nayam-ammo ti sangkatawan kadagiti nagloriaan a buya a ditay pulos inarapaap idi.

Narigat para Kadayo a Mamati iti Saantayo a Makita

Ipapanmo a kabaalam ti agbiahe nga agsubli iti panawen ken makasaritam dagiti tao a nagbiag iti rinibu wenno sangagasut a tawenen ti napalabas. Panunotem a padasen nga iladawan kadakuada ti sumagmamano a moderno a teknolohia a ditay ipirpirit ita a panawen. Kas pangarigan, ania ti mabalin a panunoten dagiti tao kadayo no inestoriatayo kadakuada maipanggep kadagiti jumbo jets, microwave ovens, dagiti maiggaman a ramit a naglaon iti adu a libro, ken video dagiti annak ken appokotayo a madagdagus a maipakitatayo iti minilmilion a tattao iti intero a lubong?

Mabalin nga adda mamati kadayo. Kaaduanna dagiti mangumsi, mangsuppiat, wenno agulimek wenno mangdangran kadayo. Mabalin nga adda dagiti agpanggep a mangusar iti panangikalintegan, panagrason, ken kinapudno nga ammoda tapno ipakitada a nayaw-awan ken agmauyong, wenno nakabutbutengtayo. Mabalin a pabasolendatayo iti pananggandat a mangisiasi wenno mangyaw-awan kadagiti dadduma.

Ngem siempre, naan-anay a nagbiddut la ketdi dagitoy a tattao. Mabalín nga agkalinteganda ken napudnoda. Mabalín a mariknada a naan-anay a pudno ti kapanunotanda. Ngem gagangay a dida kabaelan ti kumita a silalawag gapu ta saanda pay a naawat ti naan-anay a lawag ti kinapudno.

Ti Kari ti Lawag

Kasla ketdi agbalin nga ugali ti tao ti agipapan nga hustotayo uray no nagbidduttayo. Ket no daya ti mapasamak, ania ti namnama nga adda iti asino man kadatayo? Naikaritayo kadi nga umadayo nga awan turongenna iti taaw iti aggidiat nga impormasion, a naisadsad iti balsa a saan a nasayaat ti panangisangaltayo iti panangidumdumatayo?

Masarakan kadi ti kinapudno?

Ti panggep dagiti mensahek ket ti panangipakdaarko iti narag-o a mensahe a ti Dios Mismo—ti Apo dagiti Pangen a makaammo iti amin a kinapudno—inikkanna dagiti annakna iti kari a maammuanda ti kinapudno para iti bagbagida.

Panunoteno ti bileg daytoy a kari:

Ti Agnanayon ken Mannakabalin a Dios, ti Namarsua daytoy dakkell nga uniberso, kasaritananto dagiti umasiddeg Kenkuana nga addaan iti napudno a puso ken pudno a panggep.

Kasantonanto ida iti tagtagainep, parmata, panunot, ken rikna.

Kasantonanto ida iti wagas a di mapagbiddutan ken manglawlawag iti padas ti tao. Ikkannanto ida iti nadiosan a pangiturong ken sungbat para iti bukodda a biag.

Siempre, addanto dagiti aglibbi ken agkuna nga imposible ti kasta a banag, a no adda Dios, ad-adu koma ti nasaysayaat nga aramidenna ngem iti dumngeg ken mangsungbat iti kararag ti maysa a tao.

Ngem ibagak daytoy kadakayo: Maseknan ti Dios kadakayo. Denggen ken sungbatannanto dagiti bukodyo a saludsod. Umayto ti sungbat dagiti kararagyo iti bukodna a wagas ken iti bukodna a panawen, ket ngarud,

nasken a sursuruem ti dumngeg iti timekna. Kayat ti Dios a sapulenyoy ti dalan nga agsubli Kenkuana, ket ti Mangisalakán isu ti dalan.⁵ Kayat ti Dios a sursuruenyoy ti maipapan iti Anakna, ni Jesucristo, ken padasenyoy ti nasamay a kappia ken rag-o nga umay manipud iti panangsurotyoy iti dana ti nadiosan a kinadisipulo.

Ay-ayatek a gagayyemko, adda nalinteg a panagpadas, nga addaan pammasingked ti Dios, a masarakan iti maysa a libro ti kadaanan a nasantuan a kasuratan a sidadadaan a magun-od ti tunggal lalaki, babai, ken ubing a siaaayat a mangpadas iti pannubok:

Umuna, nasken a sukisokenyoy ti balikas ti Dios. Kayat a sawen daya a panangbasa kadagiti nasantuan a kasuratan ken panangadal kadagiti balikas dagiti nagkauna kasta met dagiti moderno a propeta naipanggep iti naisubli nga ebanghelio ni Jesucristo— addaan panggep nga agduadua wenno agdillaw ngem addaan iti napudno a tarigagay a mangtakuat iti kinapudno. Utobenyo dagiti banag a mariknayonto, ket isaganayoy dagiti panunotyoy nga umawat iti kinapudno.⁶ “Uray no diyo tarigagayan ti ad-adu a panamati, bay-anyoy daya a tarigagay a mangtignay kadakayo . . . a makaitedkayo iti lugar a pakaibislinan [dagiti balikas ti Dios].”⁷

Maikadua, nasken nga amirisenyoy, utobenyo, saankayoy nga agamak nga agkagumaan a mamati,⁸ ken agyamankayoy no kasano ti kinaasi ti Apo kadagiti annakna manipud pay idi panawen ni Adan agingga iti panawentayoy babaen ti pannangtedna kadagiti propeta, mamamdto, ken mammaltining tapno mangiturong iti Simbaanna ken tulongandataoy a mangsapul iti dalan nga agsubli Kenkuana.

Maikatlo, nasken nga idawatyoy iti Nailangitan nga Amayo, iti nagan ti Anakna, ni Jesucristo, nga iparangarangna kadakayo ti kinapudno ti Ti Simbaan ni Jesucristo dagiti Santo iti Ud-udina nga Aldaw. Agdawatkayoy nga addaan iti napudno a puso ken pudno a panggep, addaan iti pammati ken ni Cristo.⁹

Adda pay *maikapat* nga addang, nga inted kadatayoy ti Mangisalakán: “No adda agpanggep nga agaramid iti pagayatan [ti Dios], maam-ammonanto ti maipapan iti isursurok, no aggapu iti Dios, wenno agsaoak a sisiak.”¹⁰ Iti sabali a pannaoy, no padpadasentayoy ti mangpennek iti kinapudno dagiti pagbatayan ti ebanghelio, nasken nga agbiagkayoy kadagitoy. Padasenyoy iti bukodyoy a biag ti doktrina ti ebanghelio ken dagiti pannursuro ti Simbaan. Aramidenyoy daytoy nga addaan pudno a panggep ken managibtur a pammati iti Dios.

No aramidenyoy dagitoy a banag, magun-odyoy ti kari ti Dios—nga agtungpal iti balikasna¹¹—tapno iparangarangnanto ti kinapudno kadakayoy babaen ti bileg ti Espiritu Santo. Ikkannakaytoy iti dakkell a lawag a mangipalubosto kadakayoy a kumita iti kasipngetan ken mangsaksi iti di umasping a dayag a di makita ti gagangay a tao.

Mabalín nga adda agkuna a narigat unay dagiti addang wenno awan pategda tapno pagrigatan. Ngem isingasingko a daytoy bukod a pamaneknek iti ebanghelio ken ti Simbaan ket ti kapatgan a banag a magun-odyoy itoy a biag. Saan laeng a mangbendision ken mangtarabay daytoy kadakayoy itoy a biag, no di adda pay dakkell a pakainaiganna iti biagyo agingga iti unos ti kinaagnanayon.

Dagiti Banag maipapan ti Espiritu ket Maawatan Laeng ti Espiritu

Marigatan dagiti sientista nga umawat iti taraon ti uniberso agingga a nagbalin dagiti instrumento a nadur-as a mangurnong iti naranraniag a lawag tapno maawatanda ti naan-anay a kinapudno

Insuro ni Apostol Pablo ti mayasping a prinsipio maipanggep iti naespirituan a pannakaammo. “Ti tao a linalasag saanna nga awaten dagiti banag ti Espiritu ti Dios,” insuratna kadagiti taga Corinto, “ta kenkuana isuda ti kasla kinanengneng: dina met ida mabalín nga ammuen,

agsipud ta dagitoy naespirituan ti pannakabigbigda.”¹²

Iti sabali a pannaoy, no kayatyo a lasinen ti naespirituan a kinapudno, nasken nga usarenyo dagiti umno nga instrumento. Saanyo a maawatan ti naespirituan a kinapudno no saanyo a mailasin dagiti instrumento.

Imbaga ti Mangisalakan kadatayo iti panawentayo, “Silaw dayta nagtaud iti Dios; ket isu nga umawat iti lawag, ken agtultuloy iti Dios, umawat iti ad-adu a lawag; ket rumanraniag a rumanraniag dayta a lawag agingga iti naan-anay nga aldaw.”¹³

No ad-adda nga yasidegtayo ti puspuso ken panunottayo iti Dios, ad-adda nga umagsep ti nailangitan a lawag iti kararuatayo. Ket tunggal kanito a natallugod ken napasnektayo a mangsapul iti dayta a lawag, ipakitayo iti Dios a nakasaganatayon nga umawat iti ad-adu pay a lawag. In-inut, nga agbalin a nalawag, naranianag, ken familiar kadatayo dagiti banag a kasla nabuntog, nasipngat ken karkarna.

Kasta met, a no iliklikitayo ti bagbagitayo iti lawag ti ebanghelio, agbalin a nalidem ti bukodtayo a lawag—saan nga iti uneg ti maysa nga aldaw wenno maysa a lawas ngem in-inut iti panawen—agingga a no tumaliawtayo ditayo maawatan no apay a namatitayo a pudno ti ebanghelio. Ti naglabas a pannakaammotayo ipapantayo pay ketdin a kinamaag kadatayo gapu ta nalawag idi ngem itan nagbalin nga aragaag, nakusnaw, ken adayon.

Isu nga impapilit ni Pablo a kinamaag ti mensahe ti ebanghelio kadagiti umad-adayon, “ngem kadagiti naisalakan daytoy ti bileg ti Dios.”¹⁴

Awan ti Pannubok a Litmus

Ti Simbaan ni Jesucristo dagiti Santo iti Ud-udina nga Aldaw ket lugar para kadagiti tao nga addaan iti amin a kita ti pammaneknek. Adda dagiti miembro ti Simbaan anga awan duadua ti pammaneknekda ken

mariknada unay iti kaungganda. Ikarigatan pay laeng dagiti dadduma a mangammo para iti bagbagida. Ti Simbaan ti pagtaengan para iti amin nga umay a sangkamaysa, kasano man ti kauneg wenno kadakkel ti pammaneknekta. Awan ti ammok a karatula kadagiti ridaw dagiti meetinghousetao nga agkuna, “Mangsapul a kastoy ti pammaneknekmo tapno makastrekka.”

Ti Simbaan saan laeng a para kadagiti perpekto wenno naan-anay a tao, no di ketdi para iti amin nga “umasideg ken ni Cristo, ket agbalin a naan-anay kenkuana.”¹⁵ Ti Simbaan ket para kadagiti tao a kas kadakayo ken kas kaniak. Ti Simbaan ti lugar a pagawatan ken pagaywanan, saan a pagilasinan wenno pagdillawan. Daytoy ti lugar a pagtitinnulongantayo a mangparegta, mangitag-ay, ken mangkanunong iti tunggal maysa bayat ti panangsapsapultayo iti nailangitan a kinapudno.

Kamaudiananna, agdaldaliasat-tayo nga agsapul iti lawag ti Dios bayat ti pannagnatayo iti dalan ti kinadisipulo. Ditayo pabasolen dagiti dadduma iti kabassit wenno kaawan ti lawagda; ketdi, taripatuen ken paregtaentayo ti amin a lawag agingga a lumawlawag, rumanraniag, ken pudno.

Maysa a Kari iti Amin

Bigbigentayo koma a masansan unay a ti pananggun-od iti pammaneknek ket maysa a minuto, iti maysa nga oras, wenno maysa nga aldaw. Saan a mapasamak daytoy iti apagkanito. Ti proseso ti panangurnong iti naespirituan a lawag ket di aggibus a panagsapsapul.

Ti pammaneknekyo iti sibibiag nga Anak ti Dios ken ti naisubli a Simbaanna, Ti Simbaan ni Jesucristo dagiti Santo iti Ud-udina nga Aldaw, mabalin a saan nga umay a dagus kas tarigagayanyo, ngem ikarik kadakayo daytoy: no aramidenyo ti rebbenyenyo, umayto daytoy.

Ket agbalinto a nagloriaan daytoy.

Idatonko ti bukodko a pammaneknek a ti naespirituan a kinapudno ti mangpunnonto iti pusoyo ken magsilnagto iti espirituyo. Ipalnaagnanto kadakayo ti natarnaw a sirib nga addaan nakaskasdaaw a rag-o ken nailangitan a kappia. Napadasakon daytoy iti bagik babaen ti bileg ti Espiritu Santo.

Kas iti inkari dagiti nagkauna a nasantuan a kasuratan, ti di mayebkas a kaadda ti Espiritu ti Dios gubua-yenna ti dayyeyo iti panangsubbot nga ayat,¹⁶ iturongna dagiti matayo iti langit, ken yebkasyo ti timekyo iti Kangatuan a Dios, ti Pagkamanganyo, ti Namnamayo, ti Salaknibyoy, ken ti Amayo. Inkari ti Mangisalakan a no agsapulkayo, makasapulkayo.¹⁷

Paneknekak a pudno daytoy. No sapulenyoy ti kinapudno ti Dios, nga ita ket kasla nalidem, saan a makita, ken adayo ket in-inut a maipakita ken malawagan ken mayasideg iti pusoyo babaen ti lawag ti parabur ti Dios. Dagiti nagloriaan a naespirituan a buya, di maarapaap a makita iti mata ti tao, ket maipakitanto kadakayo.

Paneknekak a daytoy naespirituan a lawag ket magawgaw-at ti tunggal anak ti Dios. Lawlawaganna ti panunotyoy ken alep-epanna ti riknayo ken mangted rag-o kadagiti aldawyo. Patpatgek a gagayyem, saankayo koma nga agtaktak iti kanito nga agkalikagum a maaddaan ken mangpapigsa iti bukodyoy a pammaneknek maipapan iti nadiosan nga aramid ti Dios, uray pay ti aramid iti lawag ken kinapudno.

Ti bukodyoy a pammaneknek iti lawag ken kinapudno ket saan laeng a mangbendision kadakayo ken ti kaputotanyoy ditoy a biag, no di kumaduanoy pay kadakayo agingga iti kinaagnanayon, kadagiti lubong nga awan patinggana. Iti daytoy, ipaneknekko ken ibatik kadakayo ti pamendisyonko, iti nagan ni Jesucristo, amen.

DAGITI NAGADAWAN

1. Moises 1:33.
2. Kitaen iti Marcia Bartusiak, *The Day We Found the Universe* (2009), xii. Kanayon a masmasdaawak a mabalintayo ti agtalek kadagiti panangigibustayo. No dadduma dakkel unay ti panagtalektayo gapu ta ipapantayo nga addaantayo iti amin a kinapudno. Pagarigan a kasasaad: “ Ni Simon Newcomb, ti dean ti American astronomy iti maudi a panawen ti maikasangapulo-ket-siam a siglo, insaritana iti maysa nga obserbatorio a dedikasion idi 1887, ‘a no maipanggep iti astronomy . . . kasla napardas nga umas-asidegtayon kadagiti beddeng ti pannakaamotayo. . . . Ti resulta ket ti aramid a pudno a mangawis iti pasnek ti astronomer iti panangtakuat kadagiti baro a banag ket saan a napatpateg ngem iti panangilawlawag kadagiti naammuanen” (Bartusiak, xv).
3. Makaay-ayo nga utobentayo ti Moises 1:33, 35 a mainaig iti daytoy “kabarbaro a” takuat. Ti libro ni Moises iti Perlas a Kapatgan ket nainpalgak ken ni Propeta Joseph Smith idi Hunio 1830, agarup dumani maysa a siglo sakbay nga impadamag ni Edwin Hubble ti takuatna maipapan kadagiti adayo a galaxy wenna law-ang.
4. Kitaen, kas pagarigan, ti Hubble Heritage Image Gallery iti heritage.stsci.edu/gallery/gallery.html.
5. Kitaen iti Juan 14:6.
6. Kitaen iti 3 Nephi 17:3.
7. Alma 32:27.
8. Kitaen iti Doktrina ken Katulagan 67:3.
9. Kitaen iti Moroni 10:3–5.
10. Juan 7:17; kitaen met iti Salmo 25:14; Juan 3:21.
11. Kitaen iti Doktrina ken Katulagan 82:10.
12. I Taga-Corinto 2:14.
13. Doktrina ken Katulagan 50:24.
14. I Taga-Corinto 1:18
15. Moroni 10:32; kitaen met iti Doktrina ken Katulagan 20:59.
16. Kitaen iti Alma 5:26.
17. Kitaen iti Doktrina ken Katulagan 88:63.

© 2014 ti Intellectual Reserve, Inc. Nailatang amin a karbengan. Naimaldit iti EUA. Pannakaanamongna iti Ingles: 6/14. Pannakaanamongna a maipatarus: 6/14. Pannakaipatarus ti *Visiting Teaching Message*, November 2014. Ilokano. 10871 864